

Ingoa: _____

Rangi: ____/____/____

Nau Mai Reme Mā

Nā Wiremu Reedy

Whatukura

He kōrero tēnei mō te rā tuatahi o ētahi reme māhanga ki te whaiao. Ka mōhio te māmā kua tae mai te wā ki te whakawhānau mai ana reme, ka takoto, ā, ka tīmata ki te pana i te reme tuatahi kia puta mai. Ka tīmata tonu ki te miti ki te horoi i tana reme.

Ka hiainu te punua reme e kimi ana i ngā ū o tana kātua. Rua tekau mā rima meneti pea te roa, kua reri anō te māmā ki te whakawhānau mai i te reme tuarua. Koia nei i kī ai he māhanga. Kāre kē he mutunga mai o te mīharo.

I whānau mai te reme i roto i tētahi pēke waiwai, ā, ka mitimitia e te māmā te pēke nei kia makere. Kei te hono tonu ia ki tōna pito, te mea whāngai atu i a ia i ngā rima marama i roto ia i te puku o tōna māmā.

Nā te mitimiti o te māmā, ka makere te pito, ā, ka uhia te reme i te hau o te ao. Ahakoa ngā momo kakara, ka mōhio tonu te hipi uwaha ko ēhea ana punua, ā, ka mōhio hoki ngā punua ki ō rātau ake kātua.

Kāre e roa kua tū tonu ngā reme nei ki runga i o rāua waewae wiriwiri ai, ā, kua mauria tonu e tō rāua māmā ki tā rāua hīkoi tuatahi. Piri tata tonu te hīkoi haere a ngā reme māhanga nei.